

Banator eta banoa

I

Dozena erdi bertso jartzera
nintzen behin konprometitu
kanpora noa eta maleta
egin gabe nor abitu.
Hementxe nabil bi lanak nahastuz
eseri eta zutitu
errima on bat bilatu eta
kantzontziloak aurkitu...
azken orduan lan egiteak
bentajak ere baditu!



MADDI SOKOA

II

Azken orduko lana ez da beti
perezosoan ezkutu
askotan hala izaten dela
nahiz eta geuk ezagutu.
Lanak aurretik egitea da
kontzientziaren imutu
hau zuzendu ta hura aldatu
zuzenketekin damutu...
Azken orduan dabilen harek
ezin du ezer ikutu.

III

Azken orduan lan egitea
ardura eskasa dala
azken orduan lanak egiten
ditugula nolahala.
Ez nago ados, ez al da hobe
okupazio hutsala?
pre-okupazio epeak behar du
luzea eta zabala
Camilo José Celaren siestek
ta sofa onek bezala.

IV

Azken orduan lan egiteko
gure ohitura ta grina
nerbioentzat ez izan arren
oso plater atsegina.
Baldin lanaren emaitza bada
kaxkarra edo erkina
erlojupeko presati hori
kontsolatzen da jakina...
pentsatuz: "Behintzat orekan daude
emaitza ta ahalegina".


V

Azken orduan makina bat lan
egiten dira bizitzan
Jainkoa bera mundua sortzen
juxtu juxtu ibili zan.
Larunbata ere heldu zitzaion
lan guztiak buka zitzaion
azken orduan aritzen dena
ezin hartu alfer gisan:
egitekoak egiten ditu
nahiz azken orduan izan.

VI

Azken orduan zedozer ongi
irtenez gero tarteka
bukatzen duzu konfiantza ta
ziurtasunez beteta.
Hori bentaja handia dugu
baina zoririk ez tenta...
Pasaporte, hiru pirata,
txankletak, lau kamixeta...
hara! bertsoak amaitu ditut
ta itxuratu dut maleta.

DOINUA: "Hil da Canovas".



Bidali zure sortak bertsoak@argia.com helbidera. Aukeratuak orri honetan argitaratuko ditugu.